

人事典第六十九卷

富貴部彙考

書經 洪範

九五福一曰壽二曰富

注富者有廩祿也大陳氏大猷曰五福壽爲先雖壽不可無以養其生故

富次之

禮記 曲禮

問國君之當數地以對山澤之所出

注數地舉其土地之廣狹如百里七十里五十里各言之也

山澤所出如魚鹽蜃蛤金玉錫石之類也

問大夫之富曰有宰食力祭器衣服不假

注宰邑宰也有宰則有采地矣食力謂食下民賦稅之

力衣服祭服也

問士之富以車數對

注上士三命得賜車馬故問士富則以車數對也

問庶人之富數畜以對

注庶人之受田有定制惟畜牧之多寡在乎人故數畜以對也

祭義

一命齒于鄉里再命齒于族三命不齒

注

一命齒于鄉里非其鄉里則以爵而不以齒可知再命

齒于族非其族則以爵而不以齒亦可知三命不齒雖于其族亦不得而齒之矣則鄉里又可知此貴貴之義

周禮 天官

大宰之職以八柄詔王馭羣臣一曰爵以馭其貴

訂義

王昭禹曰先王制爵以待有德德有小大則

爵有尊卑外之爲邦君則有公侯伯子男內之爲王臣則有公卿大夫士五儀之命見於諸侯五等之命見於諸臣皆王之所爵也天下之人苟有之則貴無之則賤此所以馭其貴 鄭鏐曰與以公侯伯子男之爵則有爲君之貴與以卿大夫士之爵則有爲臣之貴

二曰祿以馭其富

王昭禹曰祿以待有功效有多寡則祿有厚薄故同勳等其功則王功曰勳終

於戰功曰多上自國君下至庶人有授之田有授之食或相倍蓰或相什伯皆王所祿也天下之人苟得之則富不得則不富此所以馭其富 鄭鏐曰與以萬鍾之祿則大焉而富之與以升斗

之粟則小焉而富之

以八統詔王馭萬民六曰尊貴 鄭康成曰尊貴尊天下之貴者 王昭禹曰爵以馭貴朝廷之所尊也馭以尊貴民知爵命之不可陵

以九兩繫邦國之民二曰長以貴得民 鄭康成曰長諸侯也一邦之貴民所仰也

九曰藪以富得民 鄭康成曰富謂藪中材物 王昭禹曰所生之物充物繁庶而民取之足以爲富故曰以富得民

地官

大司徒之職以保息六養萬民六曰安富 鄭鏐曰富家巨室小民之所依賴資其有餘以補其不足苟謂其富厚而賦取無藝富者不安小民亦失所依非國家之福漢武因豪富筭緡錢中人家大抵皆破而海內蕭然蓋不知安富之道

爾雅 釋詁

賑富也 注 謂隱賑富有 疏 皆豐財也

富貴部總論

孝經 諸侯章

在上不驕高而不危制節謹度滿而不溢高而不危所以長守貴也滿而不溢所以長守富也富貴不離其身然後能保其社稷而和其民人

孔子家語 六本

孔子曰以富貴而下人何人不尊以富貴而愛人何人不親發言不逆可謂知言矣言而衆嚮之可謂知時矣是故以富而能富人者欲貧不可得也以貴而能貴人者欲賤不可得也以達而能達人者欲窮不可得也

孔叢子 公儀篇

子思曰吾之富貴甚易而由不能夫不取於人謂之富不辱於人謂之貴不取不辱其於富貴庶矣哉

說苑 貴德

楚王問莊辛曰：「君子之行奈何？」莊辛對曰：「居不爲垣牆，人莫能毀傷；行不從周衛，人不能暴害。此君子之行也。」楚王復問：「君子之富奈何？」對曰：「君子之富，假貸人不德，也不責也；其食飲人不使，也不役也。親戚愛之，衆人喜之，不肖者事之，皆欲其壽樂而不傷于患。此君子之富也。」楚王曰：「善！」

韓詩外傳 論富貴

福生于無爲而患生於多欲，知足然後富，從之德宜；君人然後貴，從之故貴。爵而賤德者，雖爲天子不尊矣；貪物而不知止者，雖有天下不富矣。夫土地之生不益，山澤之出有盡，懷不富之心而求不益之物，挾百倍之欲而求有盡之財，是桀紂之所以失其位也。詩曰：「大風有隧，貪人敗類。」

無能子 質妄篇

天下人所共趨之而不知止者，富貴爾。所謂富貴者，足于物爾。夫富貴之亢極者，大則帝王，小則公侯而已。豈不以被袞冕處宮闕，建羽葆，警蹕故謂之帝王？耶？豈不以戴簪纓，喧車馬，仗旌旄，鐵鉞故謂之公侯？耶？不飾之以袞冕，宮闕羽葆，警蹕，纓車馬，鐵鉞，又何有乎帝王公侯哉？夫袞冕羽葆，簪纓鐵鉞，旌旄車馬，皆物也。物足則富貴，富貴則帝王公侯。故曰：「富貴者足物爾。」夫物者，人之所能爲。

者也自爲之反爲不爲者感之乃以足物者爲富貴無物者爲貧賤于是樂富貴恥貧賤不得其樂者無所不至自古及今醒而不悟壯哉物之力也夫

冊府元龜 富

洪範之述五福其二曰富仲尼亦云富人之所欲也故潤屋之訓見紀于策書素封之重非藉乎祿位又何況編列之戶以財力相君游談之士以貧賤爲恥者哉三代以下乃有陪臣擬于公室匹夫敵于國君財力雄于京師射獵比于王者莫不藉其世資因其邑入占山澤之貨憑商賈之業或深耕以多積或居物而射利以至權倍稱之息廣畜牧之術精于方伎處于浩穰以致夫生生之厚焉然而老氏戒乎多藏仲尼鄙其不義自非保之以禮節約之以尋幅又曷能免充詘之誚逃偏重之釁哉

榮遇

易曰崇高莫大于富貴詩曰爲龍爲光蓋士之趨世者或道合時主或功濟大業然後享豐祿齒高位澤及于宗黨寵被于閭閻度越羣品垂爲美談者斯有之矣若乃出于困辱奮自卑冗終以貴盛

申其志節以至期運亨會勢望熏灼明詔敦獎徽美舉集或漿服歸于故郡或榮養及于庭闈或展墓以達永懷或卽家而爲公府至乃父子更任于劇職宗戚迭處于要任以壯齒而躋顯仕因請老而還舊貫中外更踐便蕃增秩時君異其恩禮舉將更其出處斯皆才命胥契福祿來同致光景之振耀聳人倫之欽慕非夫保若驚之訓得持盈之道又曷能克終而寡悔哉

周子通書 富貴

君子以道充爲貴身安爲富故常泰無不足而銖視軒冕塵視金玉其重無加焉爾 此理易明而屢言之欲人有以真知道義之重而不爲外物所移也

清暑筆談 論處富貴

富者怨之府貴者危之機此爲富貴而處之不以其道者言之也乃若處榮利而不專履盛滿而知止持盈守謙何怨府危機之有

富貴部藝文一

貨殖傳總叙

史記

老子曰至治之極鄰國相望鷄狗之聲相聞民各甘其食美其服安其俗樂其業至老死不相往來必用此爲務輓近世塗民耳目則幾無行矣太史公曰夫神農以前吾不知已至若詩書所述虞夏以來耳目欲極聲色之好口欲窮芻豢之味身安逸樂而心誇矜勢能之榮使俗之漸民久矣雖戶說以眇論終不能化故善者因之其次利道之其次教誨之其次整齊之最下者與之爭夫山西饒材竹穀繡旄玉石山東多魚鹽漆絲聲色江南出枏梓薑桂金錫連丹沙犀瑇瑁珠璣齒革龍門碣石北多馬牛羊旃裘筋角銅鐵則千里往往山出碁置此其大較也皆中國人民所喜好謠俗被服飲食奉生送死之具也故待農而食之虞而出之工而成之商而通之此寧有政教發徵期會哉人各任其能竭其力以得所欲故物賤之微貴貴之微賤各勸其業樂其事若水之趨下日夜無休時不召而自來不求而民出之豈非道之所符而自然之驗邪周書曰農不出則乏其食工不出則乏其事商不出則三寶絕虞不出則財匱少財匱少而山澤不辟矣此四者民所衣食之原也原大則饒原小則鮮上則富國下則富家貧富之道莫之奪予而巧者有餘拙者不足故太公望封于營丘地瀋鹵人民寡于是太公勸其女功極技巧通魚鹽則人物歸之襁至而輻湊故齊冠帶衣履天下

海岱之間斂袂而往朝焉其後齊中衰管子修之設輕重九府則桓公以霸九合諸侯一匡天下而管氏亦有三歸位在陪臣富于列國之君是以齊富彊至于威宣也故曰倉廩實而知禮節衣食足而知榮辱禮生于有而廢于無故君子富好行其德小人富以適其力淵深而魚生之山深而獸往之人富而仁義附焉富者得勢益彰失勢則客無所之以而不樂夷狄益甚諺曰千金之子不死于市此非空言也故曰天下熙熙皆爲利來天下攘攘皆爲利往夫千乘之王萬家之侯百室之君尙猶患貧而况匹夫編戶之民乎

漢興海內爲一開關梁弛山澤之禁是以富商大賈周流天下

交易之物莫不通得所欲而徙豪傑諸侯強族於京師關中自汧雍以東至河華膏壤沃野千里自虞夏之貢以爲上田而公劉適邠大王王季在岐文王作豐武王治鎬故其民猶有先王之遺風好稼穡殖五穀地重重爲邪及秦文孝繆居雍隙隴蜀之貨物而多賈獻孝公徙櫟邑櫟邑北卻戎翟東通三晉亦多大賈武昭治咸陽因以漢都長安諸陵四方輻湊並至而會地小人衆故其民益玩巧而事末也南則巴蜀巴蜀亦沃野地饒卮薑丹沙石銅鐵竹木之器南御滇犍僊僊西近邛笮笮馬旄牛然四塞棧道千里無所不通唯褻斜綰轂其口以所多易所鮮天水隴西北地上郡與關

中同俗然西有羌中之利北有戎翟之畜畜牧爲天下饒然地亦窮險唯京師要其道故關中之地於天下三分之一而人衆不過什三然量其富什居其六昔唐人都河東殷人都河內周人都河南夫三河在天下之中若鼎足王者所更居也建國各數百千歲土地小狹民人衆都國諸侯所聚會故其俗纖儉習事楊平陽陳西賈秦翟北賈種代種代石北也地邊胡數被寇人民矜憤忤好氣任俠爲姦不事農商然迫近北夷師旅亟往中國委輸時有奇羨其民羯羗不均自全晉之時固已患其僇悍而武靈王益厲之其謠俗猶有趙之風也故楊平陽陳祿其間得所欲溫軫西賈上黨北賈趙中山中山地薄人衆猶有沙丘紂淫地餘民民俗僇急仰機利而食丈夫相聚游戲悲歌慷慨起則相隨椎剽休則掘冢作巧姦冶多美物爲倡優女子則鼓鳴瑟跕屣游媚貴富入後宮徧諸侯然邯鄲亦漳河之間一都會也北通燕涿南有鄆衛俗與趙相類然近梁魯微重而矜節濮上之邑徙野王野王好氣任俠衛之風也夫燕亦勃碣之間一都會也南通齊趙東北邊胡上谷至遼東地踔遠人民希數被寇大與趙代俗相類而民雕悍少慮有魚鹽棗栗之饒北鄰烏桓夫餘東綰濊貉朝鮮眞番之利洛陽東賈齊魯南賈梁楚故泰山之陽則魯其陰則齊齊帶山海膏壤千里宜桑麻人

民多文綵布帛魚鹽臨菑亦海岱之間一都會也其俗寬緩闊達而足智好議論地重難動搖怯于衆鬪勇于持刺故多劫人者大國之風也其中具五民而鄒魯濱洙泗猶有周公遺風俗好儒備於禮故其民齷齪頗有桑麻之業無林澤之饒地小人衆儉嗇畏罪遠邪及衰好賈趨利甚于周人夫自鴻溝以東芒碭以北屬巨野此梁宋也陶睢陽亦一都會也昔堯作游成陽舜漁于雷澤湯止于亳其俗猶有先王遺風重厚多君子好稼穡雖無山川之饒能惡衣食致其畜藏越楚則有三俗夫自淮北沛陳汝南南郡此西楚也其俗剽輕易發怒地薄寡于積聚江陵故郢都西通巫巴東有雲夢之饒陳在楚夏之交通魚鹽之貨其民多賈徐僮取慮則清刻矜已諾彭城以東東海吳廣陵此東楚也其俗類徐僮胸繒以北俗則齊浙江南則越夫吳自閩廬春申王濞三人招致天下之喜游子弟東有海鹽之饒章山之銅三江五湖之利亦江東一都會也衡山九江江南豫章長沙是南楚也其俗大類西楚郢之後徙壽春亦一都會也而合肥受南北潮皮革鮑木輪會也與閩中于越雜俗故南楚好辭巧說少信江南卑溼丈夫早夭多竹木豫章出黃金長沙出連錫然董董物之所有取之不足以更費九疑蒼梧以南至儋耳者與江南大同俗而揚越多焉番禺亦其一都會也珠璣

犀璫瑀果布之湊潁川南陽夏人之居也夏人政尙忠朴猶有先王之遺風潁川敦愿秦末世遷不軌之民于南陽南陽西通武關鄖關東南受漢江淮宛亦一都會也俗雜好事業多賈其任俠交通潁川故至今謂之夏人夫天下物所鮮所多人民謠俗山東食海鹽山西食鹽鹵領南沙北固往往出鹽大體如此矣總之楚越之地地廣人希飯稻羹魚或火耕而水耨果隋贏蛤不待賈而足地勢饒食無饑饉之患以故皆窳偷生無積聚而多貧是故江淮以南無凍餓之人亦無千金之家沂泗水以北宜五穀桑麻六畜地小人衆數被水旱之害民好畜藏故秦夏梁魯好農而重民三河宛陳亦然加以商賈齊趙設智巧仰機利燕代田畜而事蠶由此觀之賢人深謀于廊廟論議朝廷守信死節隱居巖穴之士設爲名高者安歸乎歸于富厚也是以廉吏久久更富廉賈歸富富者人之情性所不學而俱欲者也故壯士在軍攻城先登陷陣却敵斬將搃旗前蒙矢石不避湯火之難者爲重賞使也其在閭巷攻剽椎埋劫人作姦掘冢鑄幣任俠并兼惜交報仇篡逐幽隱不避法禁走死地如鷲其實皆爲財用耳今夫趙女鄭姬設形容揆鳴琴揄長袂躡利屣目挑心招出不遠千里不擇老少者奔富厚也游閑公子飾冠劍連車騎亦爲富貴容也弋射漁獵犯晨夜冒霜雪馳阬谷不

避猛獸之害爲得味也博戲馳逐鬪雞走狗作色相矜必爭勝者重失負也醫方諸食技術之人焦神極能爲重糈也更士舞文弄法刻章僞書不避刀鋸之誅者沒于賂遺也農工商賈畜長固求富益貨也此有知盡能索耳終不餘力而讓財矣諺曰百里不販樵千里不販糶居之一歲種之以穀十歲樹之以木百歲來之以德德者人物之謂也今有無秩祿之奉爵邑之入而樂與之比者命曰素封封者食租稅歲率戶二百千戶之君則二十萬朝覲聘享出其中庶民農工商賈率亦歲萬息二千戶百萬之家則二十萬而更徭租賦出其中衣食之欲恣所好美矣故曰陸地牧馬二百蹄牛蹄角千千足羊澤中千足鼃水居千石魚陂山居千章之材安邑千樹棗燕秦千樹栗蜀漢江陵千樹橘淮北常山已南河濟之間千樹萩陳夏千畝漆齊魯千畝桑麻渭川千畝竹及名國萬家之城帶郭千畝畝鍾之田若干畝卮茜千畦薑韭此其人皆與千戶侯等然是富給之資也不窺市井不行異邑坐而待收身有處士之義而取給焉若至家貧親老妻子軟弱歲時無以祭祀進醵飲食被服不足以自通如此不慙恥則無所比矣是以無財作力少有鬪智既饒爭時此其大經也今治生不待危身取給則賢人勉焉是故本富爲上末富次之姦富最下無嚴處奇士之行而長貧賤好語

仁義亦足羞也

凡編戶之民富相什則卑下之伯則畏憚之千則役萬則僕物之理也夫用貧求富農不如工工不如商刺繡文不如倚市門此言末業貧者之資也通邑大都酤一歲千釀醢醬千坭醬千甌屠牛羊彘千皮販穀糶千鍾薪槩千車船長千丈木千章竹竿萬个其輶車百乘牛車千兩木器槩者千枚銅器千鈞素木鐵器若扂𦵏千石馬蹄蹏千牛千足羊彘千雙僮手指千筋角丹沙千斤其帛絮細布千鈞文采千匹楊布皮革千石漆千斗蘗麴鹽豉千荅鮐鯨千斤魴千石鮑千鈞棗栗千石者三之狐鼯裘千皮羔羊裘千石旃席千具佗果菜千鍾子貸金錢千貫節畧會賈賈三之廉賈五之此亦比千乘之家其大率也佗雜業不中什二則非吾財也請略道當世千里之中賢人所以富者令後世得以觀擇焉

貨殖傳序

漢書

昔先王之制自天子公侯卿大夫士至於皁隸抱關擊柝者其爵祿奉養宮室車服棺槨祭祀死生之制各有差品小不得僭大賤不得踰貴夫然故上下序而民志定於是辨其土地川澤丘陵衍沃原隰之宜教民種樹畜養五穀六畜及至魚鼈鳥獸蠶繭蒲材幹器械之資所以養生送終之具靡不

皆育育之以時而用之有節草木未落斧斤不入於山林豺獺未祭罝網不布於罃澤鷹隼未擊矰
弋不施於後隧旣順時而取物然猶山不荏蕨澤不伐天鰈魚麇卵咸有常禁所以順時宣氣蕃阜
庶物稽足功用如此之備也然後四民因其土宜各任智力夙興夜寐以治其業相與通功易事交
利而俱贍非有徵發期會而遠近咸足故易曰后以財成輔相天地之宜以左右民備物致用立成
器以爲天下利莫大乎聖人此之謂也管子云古之四民不得雜處士相與言仁誼於閒宴工相與
議技巧於官府商相與語財利於市井農相與謀稼穡於田壟朝夕從事不見異物而遷焉故其父
兄之教不肅而成子弟之學不勞而能各安其居而樂其業甘其食而美其服雖見奇麗紛華非其
所習辟猶戎翟之與於越不相入矣是以欲寡而事節財足而不爭於是在民上者道之以德齊之
以禮故民有恥而且敬貴誼而賤利此三代之所以直道而行不嚴而治之大略也及周室衰禮法
墮諸侯刻桷丹楹大夫山節藻稅八佾舞於庭雍徹於堂其流至乎士庶人莫不離制而棄本稼穡
之民少商旅之民多穀不足而貨有餘陵夷至乎桓文之後禮誼大壞上下相冒國異政家殊俗嗜
欲不制僭差亡極於是商通難得之貨工作亡用之器士設反道之行以追時好而取世資僞民背

實而要名姦夫犯害而求利篡弑取國者爲王公圉奪成家者爲雄桀禮誼不足以拘君子刑戮不足以威小人富者木土被文錦犬馬餘肉粟而貧者短褐不完哈菽飲水其爲編戶齊民同列而以才力相君雖爲僕虜猶亡愠色故夫飾變詐爲姦軌者自足乎一世之間守道循理者不免於飢寒之患其教自上興絲法度之無限也故列其行事以傳世變云

富貴部藝文二詩

相逢行

漢樂府

相逢狹路間道隘不容車不知何年少夾轂問君家君家誠易知易知復難忘黃金爲君門白玉爲君堂堂上置樽酒作使邯鄲倡中庭生桂樹華燈何煌煌兄弟兩三人中子爲侍郎五日一來歸道上自生光黃金絡馬頭觀者盈道傍入門時左顧但見雙鴛鴦鴛鴦七十二羅列自成行音聲何囀囀鸛鳴東西廂大婦織綺羅中婦織流黃小婦無所爲挾琴上高堂丈人且安坐調絲方未央

贈郭駙馬

唐李端

青春都尉最風流二十功成便拜侯金距鬪雞過上苑玉鞭騎馬出長秋薰香荀令偏憐少傅粉何